

[Sápmi](#) 31.5.2016 klo 15:40 | beaivduvvon 31.5.2016 klo 15:45

## Oktasaš deaivvadeamit leat dehálaččat vuorraset olbmuide – Gáregasnjárgga kapealla dievai olbmuin miehtá Sámi

**Mannan vahkus ledje Gáregasnjárgga kapeallas SámiSostersearvvi Muittohallan-prošeavtta ordnen gidđadoalut vuoras olbmuide. Kapellii ledje čoahkkanan vuorrasat iešgudetguovlluin Sámis. Deháleamos oassi doaluin lei deaivat nubbi nuppi ja ságastallat.**



Video

Vuoras olbmot miehtá Sámi čoahkkanedje mannan vahkus Gáregasnjárgga kapellii gidđadoaluide.

Jearaldat lei sámiid sosiála- ja dearvvasvuodasearvvi, SámiSostera ordnen deaivvadeamis. Doaluin lei boradeapmi, rohkosboddu ja gáfestallan.

Deháleamos goit lei oassálastiide deaivvadit odđa ja boares oahppásiiguin.



Karen Anne Stoor. Govva: Kirsti Länsman / Yle

– Mun dál oainnán dakkár olbmuid, geaid in leat ovdal oaidnán. Leat dáppe gal oahpes olbmotnai, dakkárat geaid in leat mánnávuoda rájes oaidnán, muitala Karen Anne Stoor Bealdovuomis.



Elli Kristiina Näkkäljärvi. Govva: Kirsti Länsman / Yle

– Galhan dat dieđusge lea buorre olbmuide geat leat akto, ahte besset oaidnit nuppiid, muitala Elle Risten Näkkäljärvi Lismmás.

### **Dehalaš čeahkkaneamit vuorraset olbmuide**

SámiSoster-searvvi Muittohallan-prošeavtta bargi Marketta Vuolab lea gullan hearvás muitalusaid dákkár deaivvadeamiin. Son diehtá, man dehálaččat dákkár doalut leat vuoras olbmuide.



Sami Soster -searvvi prošeaktabargi Marketta Vuolab. Govva: Kirsti Länsman / Yle

– Dat lea earenomáš dehálaš dan dihte, ahte go eaihan dál šat olbmot gallet nuppiid luhtte, eai fina šat ránnjaid luhtte ja dalle dat besset oahpes olbmot deaivvadit, dat leat fuolkkit gaskaneaset ja dat leat vázzán ovttas rihpaskuvllaid. Leatba dakkár somás muitalusatge: gii nu čavgeha "gea duon

áddjá dat gal lea juo nu boaris", "diet lea leamaš dološ mu irgi" ja dat nu njálgádit čaibmet, muitala prošeaktabargi Vuolab.

### **"Beaivi lea mannán menddo johtilit"**



Kaarin Laiti. Govva: Inger-Elle Suoninen / Yle

Doalut biste moadde diimmu. Gáregasnjárgalaš Kaarin Laiti mielas beaivi manaige menddo johtilit.

– Otná beaivi lea mannan menddo johtilit, mun in leat geargan buohkaiguin háleštit, go dávjá geavvá nu, ahte olmmoš geahččá, ahte gos leat oahpes olbmot ja manná singuin háleštit ja galggašii dahkat nuppe láhkai, ahte mannat amas olbmuid lusa háleštit, smiehtada Laiti.



Piera Niilles Paltto. Govva: Kirsti Länsman / Yle

Ohcejohkalaš Piera Niilles Paltto lea johtán SámiSoster-searvvi ordnen doaluin ovdalge ja meidne boahhtevuođasge vuolgit daidda.

– Munhan lean leamaš ovdal maiddái, mun lean mángii fitnan dáppe ja dalle go dat lea ordnen dohko Kárášjohkii, mun lean doppe maid fitnan ja leamašan álo somás reaisu, muitala Paltto.